

程

五約曰堡器

堡器者制衛之餘也制衛備而復求濟于器以盡其餘也古人曰器械不利以其卒與敵也夫堡譬則卒也制衛備則環之甲冑也而無戈戟弓矢之利焉其以堡與敵乎故五約堡器其目有八一懸簾懸簾者以護陴也夫陴之不存石及之也陴之不守矢及之也石及之為堅陴可免矣矢及之非懸簾不能免也夫陴垣所持以為命也虜渡壕則擊壕叩壕墻則擊壕墻附垣

脚則擊垣脚懸石衝木將于是乎升降而陴之不守首莫敢伸目不暇視其猶介瞽而立諸衝曰余披堅矣人莫毒也夫故必為懸簾簾以布為之實以氈絮或即用民間絮被以兩竿直出揭之如車轆然中為橫木分簾上下下垂三之二上揭三之一臨用以水濕之置陴上出陴五六尺簾既虛懸復藉水濕矢所不貫石所不損者也必多為之大抵有堡陴之半而四分之以應用則陴人雖探身垂首與下從事靡所忌矣

或疑懸簾礙于發矢曰堡制發矢石皆于敵臺陴但主近擊護壕牆以內耳即不得已欲從陴間發矢則斟酌緩急開閉隙漏可也二挨牌挨牌者備陴壞也夫陴主近擊數數引重或有隳壞則乘者不能立矣須備挨牌三四十面大堡五六十面牌長以五尺闊三尺藉以補陴亦以發矢即壕牆內敵臺上有急皆可移用也三火鎗火鎗者敵臺所用也其遠可及三百步即今軍伍中所用之神鎗而不用木矢木矢發多不

直間有反射者鄉人尤不解用今易以鉛子出直而疾中入而深莫良之器也每臺須四柄甕城加四柄壕牆面加四柄計小堡五十餘柄大堡倍之四弓矢弓矢者亦敵臺所用也遠可及百步民間多有之而不精須求買精者數視火鎗倍之五礮石礮石者亦敵臺所用也遠可及二百餘步民間舊制以手指挑繩發之不甚致遠且為力輕今制加木柄手握之以發既遠而力此既易辦又人人可為每臺可置二十餘甕

城壕牆皆加之小堡百餘大堡二百餘不為費也但須多備石塊小堡以十萬計大堡二三十萬計此石中必重傷但命中為難常計虜若臨壕不必求中但令諸臺每臺一二十人一時並發下石如雨咸萃虜所必難屯立也又石之圓扁者其去有力且大聲虜尤畏之號曰飛石六啤石啤石者啤院間所用之石也夫啤人計丁分啤何能巧力火鎗弓矢皆非所宜發但須多積石耳石有二種大者為懸石用廢碾石陸軸

之類為之鼎足鑿孔下繫鐵繩上續麻索小堡每面五六枚大堡每面十餘枚小者為擲石取之溪澗皆是須重一斤上每罈可三百餘擲石亦間備大重四五十斤者以濟懸石之不足大抵虜有入壕墻者則衆以擲石共斃之其推車蒙革肩版而至者則下大石或以懸石擊之七衝木衝木者亦罈院間用也制用大木徑一尺以上長六七尺八九尺者鑿孔兩端鐵繩雙繫則橫用之鑿孔其尾鐵繩單繫則直用之橫用者置鐵刃其腹直用者置鐵刃其首近傳虜欲為牛革洞子附城宜以此懸擊斷之其數視懸石八火筒火筒者亦罈院間用也革洞倘堅擊之不碎則宜用火筒以硝硫為筒如今上元節所試梨花者遇有洞至則急灑油及硝硫其上而以火筒噴火燃之斯須立燼也九大銃大銃者急備也夫虜矢石懸簾禦之竿轆鈎斧禦之車牌懸石禦之革洞衝木火筒禦之尚虞其畢志于我人肩土袋或挾束草千萬成羣肉薄以


逼前死不恤後繼轉加始而填壕繼以附垣弓矢鎗礮所及有限懸石衝木不能遠施則以大銃擊之銃大如嬰石大如碗前發大石後為碎子一轟震地其出升餘當無不斃且墮者也小堡面置一柄大堡倍之十雜兵雜兵者隨其所

有之兵也刀斧棒鋤利于列陣鎗戟鈎鑣利于守地道凡堡中人備數事家藏一屋雖五尺之童無不令帶兵者婦女亦然嘗計每陣須木棍

一上玉下花如每三陣須大斧或鋤刀一每六

陣須長鎗長鈎長骨朶一架有力者主斧鋤次主鎗鈎弱者主棍列陣之法也

懸簾圖



挨牌圖



火鎗圖



三眼銃圖


或曰鎗費裝藥不若
三眼銃可連三發一臺
四銃則連十二發也
亦用鉛子故附圖



礮石圖




懸石圖




衝木圖

橫用




直用

火筒圖



火銃圖



六約曰堡蠹

堡蠹者非無蠹之求也求去其蠹也夫木腐則
蟲生蟲生而木愈腐然則生息者木也而禍木
者亦木也木而能去其蠹斯材也已故六約堡
蠹其目有四一壕樹壕樹者樹植于壕足以蔽
目者也夫兩軍相對有蔽者利今俾以蔽我而
樹以蔽虜瞭望之失真矢石之礙及攀附之有
緣皆為彼利也必盡伐之且令後不復植二家
洞家洞者洞鑿于家人自為謀者也夫洞可避

寇則公共為之矣洞不足托而必築堡以守家
鑿私洞此其人有死陴之心邪近時邊堡虜至
不守陴而自匿于洞堡陷無一免者語曰噬臍
無及是之謂矣必盡塞之後有鑿者以聞官三
異籍異籍者身寓于此而托其貴貨于他所也
夫身苟不恤何恤乎無家故有異籍者有異心
者也其不棄陴踰垣而逃者幾希有一于是眾
共糾之四僑客僑客者莫知所從來而寓于堡
者也往余得之歸正人曰虜謀人人遣時時至

也有還報者有不還報者夫既有不還報者而
復未聞首官自占則其人多潛寓閭閻矣饑寒
之迫身恩怨之動氣初欲留而繼悔有所懲而
中變其態不多端乎靜而思之可寒心也夫嫁
女不出其鄉用佃豈宜遠道故必家自覺察門
書一扁曰本家家長為某為本堡長或費隊長
有弟幾人某某為某壕塙眾有子幾人某某為
某臺鎗箭手佃客幾人某某係本堡某人子
弟為某隊陴眾某某係隣堡某人子弟為某隊陴

衆家長婦為某為某婦隊長弟婦幾人某某為
某婦隊衆子婦幾人某某為某婦隊衆僑客不
知其鄉者逐不可稽其父兄宗族者逐乞丐無
來歷者逐僧道遊食者逐扁無名籍堡居二日
以上者堡長覺察非堡人親屬如婿甥者逐其
庶免于不虞也

七約曰堡衆

堡衆者非無衆之難也能用其衆之難也夫十
室之邑忠信所生盤錯之遇豪傑乃見亦顧用

之者何如耳而或舍長取短就薄推厚其孰不
解體也夫故七約堡衆其目十四一堡長堡長
者掌堡之守禦方畧以發縱指示者也擇年長
有器望為堡人信服者為之小堡以一人大堡
以二人堡更大且多才以三人其平居則稽廢
壞閱器械均丁力檢僑客月朔望集費隊長堡
人有才識者共議拒守之策圖畫已定臨事行
之不得至期張皇狼顧失措亦不得容令輕躁
妄議阻撓二費長費長者掌堡人所斂財貨以

為守禦之費者也擇堡中家富者為之小堡以
二人大堡以四人凡堡費堡隊長督辦而費長
受之受則登籍有所支用堡隊長以告費長出
之出則登籍貨非費長不手費長非堡隊長不
籍三隊長隊長者掌臺牌之衆以為守者也擇
才識次于堡長者為之小堡每面以二人大堡
每面以四人二人一為奇隊長一為正隊長臺
牌之衆分半為奇隊半為正隊臺衆如鎗手四
則二為奇二為正箭礮之類皆然牌衆則一三

五七九奇數者為奇二四六八十偶數者為正
而以二人分掌之以便調援也四壕牆衆壕牆
衆者由地道出列于壕牆之內以為守者也擇
堡中最有膽力勇士為之小堡一面十人大堡
二十人配以弓箭鎗手堡隊長自垣上執旗發
縱之可守則守可出擊則出擊其堡中有素志
立功者可悉配此以便其進退五弓箭手弓箭
手專射者也擇家富年少如堡費長之子弟為
之壕牆每面四人角敵臺每臺四人其弓箭即

令自備堡田多准折畝銀堡田少不折畝銀平
居則費長稽其弓箭之美惡盈歉堡隊長課之
習射六火鎗手火鎗手專發火器者也擇年少
而性便巧者為之人數稽課與箭手同但鎗器
火藥則費長以堡費為之不自置也七礮石手
礮石手專發礮石者也資性次于鎗手者為之
人數三四倍于鎗手稽課與之同礮具亦官置
八牌衆牌衆分守牌者也計丁受之丁多則兩
人受一牌令為二番丁少則一人受一牌主器如
前雜器條所載分奇正如前隊長條所載九懸
石衝木衆懸石衝木衆舉石木下擊者也堡丁
有餘則每石每木另撥有力者六人或三人正
隊長統之堡丁不足則分置木石于中道臨時
撥奇隊衆應用奇隊長主之十大銃手大銃手
主大銃備急迫者也堡丁有餘每銃另撥便巧
者六人或三人堡丁不足則面置一柄臨時撥
鎗手應用堡長主之十一地道衆地道衆守地
道者也堡丁有餘每道守以四丁不足擇家長

婦有識見者一人主之配以健婦八人鎗棒雜
兵隨便十二絕藝人絕藝人者或發火器或用
弓矢或善袖箭或善鐵炮技藝絕人者也列之
臺陣則膠其用矣須先行旌別其人精利其器
多則十人少則四五人專令隨堡長進退宜在
壕墻則于壕墻宜在敵臺則于敵臺虜始至諸
鎗箭手不得輕發矢石示彼以弱損我守具須
堡費隊長酌量事勢可發令絕藝人發之十三
餘衆餘衆者除諸役外集餘丁備補伍也有丁
以丁無則以老弱每面一隊多者二三十人少
者一二十人令費長主之列垣下居常為垣上
人運水飲之類垣上人倘有中傷者隊長照名
次即呼一人上補十四婦衆婦衆者堡中諸婦
也別為兩科壯健者為一科分為四隊隊以大
室家長婦有識見者一人主之其堡內街巷亦
分為四段隊主一段各執雜兵往來巡視遇火
則擊柝而司金婦隊應之遇盜則振鈴而四面
餘衆隊應之其垣上人並不得內顧老弱者為

一科亦分為四隊隊主以貧室婦屬尊者一人
隊備八釜八甕水桶十六安置堡四角所謂司
釜婦隊也有事之時必令水滿諸甕湯沸諸釜
八約曰堡教

堡教者非無教之難也必行其教之難也夫自
聖人為治不免于訓誥以導之刑禮以齊之堡
而無教烏能為守哉故八約堡教其目有四一
齊視齊視者宣之旗幟以一其目也凡堡角敵
臺必植一竿竿長一丈五尺上掛黃布大旗一

面書其角

如曰西南北
東南之類

其敵

如曰西面或西
面第一二之類

臺字

虜至則張虜去則落

如東面見寇西面不
見則東張而西落

又每

面置一旌竿竿長一丈餘上揭紅帛旌一條書

某面對敵字對敵則縛于中敵臺大旗竿上敵

退則落堡長在則下加縛小紅旗一面不在則

落遇夜易以雙紅燈堡長在加三又備黃帛旌

一條以為垣眾番食之節如後齊番條所載又

堡長執紅旗一面以指揮置小紅旗三面令健

步執隨以為調別臺奇隊之符隊長人執藍旗

一面以詔壕墻內人置小藍旗三面令健步執
隨以為調別裨奇隊之符二齊聽齊聽者宣之
金鼓以一其耳也堡每面置鼓金各一大堡二
之甫見虜其面鳴鼓以後徐徐鳴聲不絕虜去
乃已虜來攻鳴金以後徐徐鳴聲不絕止攻乃
已虜大至或填壕求渡則急鳴虜已踰壕
或攀墻觸垣則鼓金齊鳴漸退徐鳴金止攻徐
鳴鼓去皆已凡四垣有金鼓鳴則諸役人不得
一人不至役所亦不得一人番下飲食三齊擊

齊擊者次第其發以盡技也近時堡人遇虜初
至不四五騎張皇無措輕發矢石器械既耗精
力亦竭比其進攻反無以應又其始發也不以
絕藝躁妄之夫童稚之輩呵之不可禁之不止
為虜所輕招速其侮今制以七擊為節如虜甫
至或三二騎四五騎則其面張旗伐鼓後徐徐
鳴鼓堡長率絕藝人或在臺上裨間或出壕墻
內酌量視之待其集至十數騎有指揮來攻之
意則令絕藝人潛伏隱暗出其不意發鎗發矢

中其指揮者此一擊也虜或集至三四十騎拆
屋伐木以為攻具則啤張懸簾臺人大整器具
堡長率絕藝人或于臺上或出壕墻連發鎗矢
仆其馬騎此二擊也虜或集至百餘張弓注矢
射我臺啤則揭對敵旌帛鳴金後徐徐鳴金奇
正隊長整治啤石雜兵堡長督絕藝人及臺上
鎗箭手礮石手齊發此三擊也虜或集至數百
千人束芻裹袋填壕求渡則金作急鳴隊長整
治懸石衝木堡隊長督絕藝人及臺上鎗箭手
礮石手壕墻內鎗箭手礮石手同時奮發及以
旗調別面臺鎗箭手奇隊來應此四擊也虜或
填壕已平揭竿舉轅來衝我啤則金鼓齊鳴費
長整大銃堡長督臺人旁射擊之及以旗畫調
別臺奇隊隊長以藍旗詔壕墻人舉長鈎巨斧
月牙拐鈎截推仆之及督啤人下擲石四擊底
護我壕墻人此五擊也虜或隳我壕墻壕墻人
不能存立退入地道衝車革洞相繼而前則堡
長督礮人舍礮助擲大石或舉懸石衝木隊長

督陣人下油洒硝硫發火筒焚之及以旗調別
面陣衆竒隊助下擲石此六擊也虜或衝車附
垣甬道相屬前死後繼肉薄不止則堡隊長督
諸役人不得停手及以旗畫調別陣竒隊堡長
督大銃衆以大銃擊之此七擊也凡調竒隊須
查其面不揭對敵旌乃可四齊番齊番者次第
其番不使有失也如初鳴鼓則諸役人無不至
後所者鼓徐鳴則本面臺人盡立陣人正竒遍
坐鳴金則諸役人咸整器具陣人盡立別面臺
人亦立陣人遍坐金鼓齊鳴則本面臺陣人不
停擊別面臺人赴調陣人盡立金鼓俱息則二
面臺人留正隊竒隊下食歸則食正隊又歸則
食陣人竒隊又歸則食陣人正隊通歸則又食
二面者其次以東南為先西北為後當食則曳
黃帛旌于對敵竿通歸則落夜易以一白燈其
四面分番以是為候凡鼓鳴本面不得下食金
鳴諸面俱不得下食當食者食于垣下老弱婦
女饋之饋食人不得登垣送汲飲以餘衆凡堡

長率絕藝人必居于當食之面其當食曳黃旗而虜卒至則加曳紅旗照常鳴鼓鼓聞而兩旌俱曳則左隣面以臺人奇隊往右隣面以陴人奇隊往不候調又金鳴則右隣面亦以臺人奇隊往左隣面亦以陴人奇隊往不候調當食者歸乃還其還時金不止仍留左隣臺奇隊金鼓齊鳴則兩隣臺奇隊俱留

九約曰堡習

堡習者非臨事而習也無事而豫為之習也夫事豫則立否則窮况守禦大事全堡生命賴焉不有服習其虛文乎故九約堡習其目有二一習藝習藝者平居習其藝使精熟也每五日則小習之十日則大習之小習之以教射教火鎗大習之兼教礮教大銃擇空間地畢集其人為木虜者數或為草人始以射繼以鎗繼以礮銃必使有中小習卯而集午而罷大習辰而習酉而罷有增進者獎勵之拙惰者戒飭之終不可教者更易之二習守習守者平居習為守使不

失伍也每望日則小習之朔日則大習之小習以教臺人俾人壕墻人一擊以至七擊大習合餘衆婦隊衆以教分番應援巡火盜即于堡垣上下鳴鼓畢集其人亦以木虜或草人為候鳴金鼓發矢石俱如前條所載

十約曰堡符

堡符者非置符之難也符而信之難也夫人無符不立家無符不行結繩以來誰能免是而况金革之事乎故十約堡符其目有六一門符門符者列其家而懸之門者也為方牌書如前僞客條所載以防奸細二堡符堡符者列其堡衆堡教而樹之堡門上者也為大牌榜書曰某堡方若干步為幾門角臺幾敵臺幾堡丁共若干名婦若干口堡長某費長某正隊長某某奇隊長某某壕墻衆某某絕藝人某某臺臺衆正隊鎗手某某箭手某某礮手某某奇隊鎗手某某箭手某某礮手某某牌牌衆正隊某某奇隊某某牌懸石衆某某衝木衆某某大銃手

其其餘衆某某段司巡婦隊長某某衆某某
角司釜婦隊長某某衆某某右本堡為田若干畝
共出銀若干兩置造過鼓幾金幾柝幾鈴幾大
黃布旗幾長紅帛旗幾黃帛旗幾紅旗幾藍旗
幾小紅旗幾小藍旗幾懸燈幾火鎗幾鉛子幾
火藥幾弓矢幾礮具幾礮石幾大碑石幾小碑
石幾懸石幾衝木幾火筒幾大銃幾壕墻長鈎
幾大斧幾月牙拐幾牌雜兵棍幾斧幾鏟幾鎗
鈎骨朶幾釜幾甕幾桶幾餘銀若干除增添敵

臺幫加垣墻公費外尚餘若干以為將來修理
之需三臺符臺符者列臺衆懸之臺者也為圓
牌二一書正隊曰某堡堡長某人下某臺正隊
長某人統本臺臺衆正隊鎗手幾某某鎗幾鉛
子幾火藥幾箭手幾某某弓幾箭幾礮手幾某
某礮具幾石子幾一書奇隊如正四牌符牌符
者列牌衆懸之牌者也為圓牌二一書正隊曰
某堡堡長某人下某牌正隊長某人統本牌牌
衆正隊幾某某兵器幾

郎約

長

棍斧鏟
刀皆列

石幾外懸石衆幾某某懸石幾衝木衆幾某某
衝木幾大銃手幾某某大銃幾大石子幾小石
符者列壕牆內衆懸之外牌者也為圓牌書曰
某堡堡長某人下某壕牆內勇士幾某某長鈎
幾大斧幾月牙拐幾火鎗手幾某某火鎗幾鉛
子幾火藥幾箭手幾某某弓幾箭幾又本面夜
警人某大幾六婦隊符婦隊符者婦必有符巡
警者以約束其衆司釜者以均役取汲也亦為
圓牌巡隊書曰某堡某段街市司巡婦長某婦
幾某某柝幾鈴幾兵器幾釜隊書曰某堡某角
司釜婦長某婦幾某某釜幾甕幾桶幾
十一約曰堡費

堡費者非貧之患也不均之患也夫和無寡均
無貧古有是訓矣今貧者則以委富室曰我為
若扞也富者則以恐貧室曰吾不堡居也日偷
一日而堡壞且極矣故十一約堡費其目有五
一計畝計畝者計田畝以出費也今時堡費多

計堡內屋基則無屋者不及矣夫凡耕食于土者必賴堡以免堡內無屋此奸民不奉令法當治之而更費不之及將愈肆矣無事耕于野食土之毛有事叩堡門求入堡人慮人鮮不足守也有不入之者乎故今但計田畝且如蔚寬鄉田百頃上中鄉七八十頃狹鄉亦及四五十頃每畝出銀一分則寬鄉得百金上中鄉七八十金狹鄉四五十金皆足用也如有不足仍照堡內屋基另徵二三金或倩富人特出一二金可

有定價費長擇親子弟及堡中素忠實者托之
分易必求精絕無為文具如弓矢以京城為良
則告官給引兼請一牒赴京買之鎗銃必官局
為工則載鐵具直詣官求匠或別倩巧匠詣官
求式種種務實事事責用然後酌量收藏之法
如火藥每一發為一包每一鎗備一二百發一
二百發為一總包矢九枝為一束每一弓備一
二十束一二十束為一巨袋鼓必藏屋旗必投
筭不致損壞以圖永久

十二約曰堡候

堡候者非無候之難也候得其宜之難也夫天下之事任之已者力易屬之人者力難知之豫者備周發之倉卒者備踈必然之理也鄉之為約所以禦侮也然斥堠之傳收斂之令是在上之人也上之人忽之則或失警失警則失備是棄堡也上之人重之則或虛警虛警則玩備亦棄堡也則夫合辭以請于上為收斂之候不可少也故十二約堡候其目有三一初候初候者始聞警報即示候于堡也以白旗為之凡始聞警報官府即發白旗令曰虜將至其先以禾芻之類入堡旗過而不入者罪則堡人悉入禾芻堡長出其守具點視之使人視不入禾芻者焚之所以清野也二再候再候者繼聞警報亦示候于堡也以黃旗為之凡繼聞警報官府即發黃旗令曰虜即至其以騎畜之類入堡旗過而不入者罪則堡人悉入騎畜堡隊長閱守具分置之使人視騎畜不入者執之以為虜至享士

之用三終候終候者虜垂及境復示候于堡也
以紅旗為之虜垂及境令曰虜已至其無一人
一物在堡外也旗過而不入者為戮矣則堡人
無長少悉入堡隊長閉堡門鳴鼓集人登垣以
待戰使人視不入者閉之外莫納使宿于壕墻
內事已籍其名以告官罰償今次虜入用過守
具

朔野子既述鄉約喟然嘆曰嗟乎余
乃今知民無上不立也夫堡有長為
之令也有費隊長為之輔也藝者遊
巡勇者出垣巧者任火器矢礮取其
良也衆丁俾焉無用不遺也餘衆垣
下金革之事不以筋骨辭也婦人有
司參左闔之遺也釜汲不廢逮賤以
為詳也而必曰有候焉歸之上則上
之不可已也如是夫古人曰君子制
義小人從役又曰士民之倡也乃今
余為之倡矣制義以為風草上之風

必偃是在上之君子哉或曰賢者志
其大且遠者方今

聖天子在上百司承之封狼居胥將臣抵
掌舞羽兩階儒賢獻謨城境扼要邊
閩紆策子胡屑屑約鄉人為堡守也
朔野子潛然曰余閭閻之人閭閻之
見也子胡責之深邪余自庚子歲罷
徽倅赴調抵家繼懼家變先宜人奄
棄荷甬理丘壠餘即與鄉長老坐樹
石邊共談鄉堡事得其情如此故述
以告諸長老之子孫以為能全其堡
者能全其身者也能全其身者竭力
以事

聖天子者也其

廟堂大議閭幄雄畧非惟心所不解耳
亦不可得而聞也古人有負暄而適
食芹而美者以不忘其君而獨余邪
子胡責之深邪且今防秋之令嚴則

內郡鮮兵城塞之役衆則民堡失備
論者徃徃有中虛之慮而秋在必防
伍難溢額舍畎畝奚求焉備之有素
教之知方所謂不待徵令而帶甲具
也孰謂無補于遠且大者哉

附質神文

嘉靖庚戌仲春月望蔚人福建道監察御史郝
銘徽州府同知尹畊及蔚郡學生若而人格于
郡廟質諸

神曰蓋聞急難遜夷義之先圖國忘勞貞之大故
漆室存大夫之憂兔宜備干城之重慨茲虜寇
上廛

主憂凡我邊人力足摧鋒勇堪括刃者固已神馳
賊壘畢力疆場矣相惟餘衆可遂即安今約里
間共圖保障其有素志邪回危言惑衆者是謂
樂禍矜已護前侵敗規制者是謂長傲慳貨斬
施不供資費者是謂縱貪挾私逞恣不順告戒
者是謂即頑任數尚狙肆為欺隱者是謂行險

飾智舞文殊方漁獵者是謂窮凶有一于是
神其殛之

告鄉直言

鄉人郝銘尹畊謹白

同鄉長少諸君子凡我生人所重者忠孝而已
忠者從上之令孝者不失其身家今虜患甚大
消息甚著每來降人多說今年要搶順聖川蔚
州即今上司每每行文差人着百姓每併小堡
為大堡修理敵臺置買器械因循日久不見舉

行上司好生怪責百姓說愚頑難使不從號令
百姓又徃徃私議上司說差來人並無實事止
具虛文查點督催別生支節仔細思之不若我
們將堡自行歸併修理工械亦置買完備以後
上司聞之必然歡喜也不再差人查點省了多
少吞應設使上司不知某二人忝備衣冠也當
具實轉聞後免查點夫從上之令為忠保身家
為孝雖無上司號令猶當為之况有明文又免
煩擾何故不為誠恐諸君子長少不齊智慮亦

別甲可乙否計議難定某二人逐一廣詢細講
斟酌併堡守堡之法條款俱備今為鄉約刊布
同鄉又恐辭煩有不解者再此奉曉其鄉約雖
係十二條若堡置則多築打已定難以更移堡
候某二人詣官祈請俯從末議其最緊要當先
行者第一是併堡必使每堡有四五百人已併
之堡即時推壞墻垣一二堵取其門磚門扇為
存留堡甕城之用存留堡亦要趁春融和修補
墻垣改換垛口角臺敵臺必須高于墻一丈上

方二丈堡大者增添其次則墻外壕內必須攔
馬墻每面必掘地道門外必築甕城又其次則
每臺必須火鎗四柄弓箭八付礮股子二十付
擲石懸石衝木大銃俱不可少又其次則先將
堡內居人編選已定誰為堡隊費長誰為鎗箭
礮手誰為絕藝人誰為攔馬墻內人誰為守垛
口人一一明白免致差錯又其次則箭鎗礮手
必須習演成熟臨時酌發又其次則照地出銀
不許侵欺務求濟事其詳備載鄉約內此特言

其大槩也大抵家居邊塞切近胡虜雖有勞費
所不得辭且如今時鄉里或置買取贖為一畝
田雞鳴犬吠為一口氣與人告狀者一二年上
下使用來往奔走該費盤纏多少悞事多少甘
心為之不以為悔今家口資貨俱在堡內殺戮
燒燬所費豈止一畝田擄掠逼脇所恨豈止一
口氣雖費家產之半悞事一年以上不可顧惜
也狂妄僭言惟諸君子諒之

鄉約終

